

La facultad da la Quarta Lingua procura per critica

Curs d'uffants a Turitg – ils daners van da rendì

■ (anr/vi) **Admoniziuns d'in revisur ha la suprastanza da la Quarta Lingua stuì tadlar la mesemna passada durant la radunanza generala a Turitg. Anc avant diesch onns ha l'uniun da fautors gi in bel daner en sia facultad. Uss èsi prest mo pli la mesadad.** «Nus avain udi e prendain a pèz», ha respundi la presidenta *Petra Camathias* sin la critica. «Nus vegin quest onn a tschentiar ensemen in budget ed a reducir las contribuziuns per la cultura.» Vi dal quint annual sco tal n'han ils revisurs gi da reclamar nagut. Anzi, els han constatà che las finanzas vegin administradas a moda correcta uschia ch'ils commembers han approvà unanimamain il quint 2017.

Betg duvrar si la reserva

Il revisur *Rinaldo Luzio* ha admonì la suprastanza da far ponderaziuns co ch'ins procedia en l'avegnir cun las finanzas. Il 2008 hajan ins anc gi ina facultad da radund 120 000 francs, la fin da l'onn passà mo anc 70 648 francs. Ils ultims diesch onns haja il quint serrà otg giadas cun in deficit. «Uschia na va i betg vinavant», ha avertì *Luzio*. La suprastanza duai preschentar mintgamai in budget a la radunanza e procurar per in quint equilibrà. Las entradas summian mintg'onn sin passa 15 000 francs. Cun quels daners possian ins financiar las donaziuns culturalas e l'administraziun. La facultad duai vegnir mantegnida sco reserva.

Suenter quest votum ha i dà or dal ravugl dals preschents la proposta d'augmentar la contribuziun da commember dals pensiunads. Lezs han fin uss pajà be 25 francs l'onn. La radunanza ha decidì ch'er ils pensiunads pajan en l'avegnir 50 francs sco ils auters commembers.

In sponsur per il curs d'uffants?

En ses rapport annual ha la presidenta enumerà cudeschs, comics, teaters, dc's e paginas d'internet che l'uniun ha sustegnì l'onn passà. En tut ha la suprastanza concedì 12 donaziuns per promover la lingua rumantscha en ses idioms ed en rumantsch grischun.

Plinavant organisescha la Quarta Lingua ensemen cun la Lia Rumantscha a Turitg curs per uffants rumantschs. La summa che l'uniun ha gi a disposiziun per financiar quest curs va da rendì, ha ditg *Camathias*. Ils ultims onns haja la Lia Rumantscha anc gidà. Ma per pudair cuntinuar stoppian ins chattar in sponsur.

L'onn proxim tschertgia l'uniun puspe dus fin trais novs suprastants e tgi che haja interess da s'engaschar per la cultura rumantscha duaja s'annunziar, ha supplitgà la presidenta. Da preschent vegn la Quarta Lingua timunada sper la presidenta da *Bettina Berther*, *Ivana Cabalzar*, *Barbara Cuffaro*, *Nathalie Killias*, *Kaspar Silberschmidt*, *Bettina Vital* ed *Ivo Zen*.

Dus che fan buna farina

Sco mintg'onn ha i era questa giada puspe dà in ivetta culturala. Suenter las tractandas han *Benedetto Vigne* ed *Astrid Alexandre* preschentà haikus e chanzuns. Tranteren han els discutà davart musica, scriver haikus, art e politica, la scena da musica dominada dad umens u la schelta da la lingua – englais, franzos u rumantsch – per scriver in nov song. Ils dus musichers da duas generaziuns han fatg buna farina e manà in discurs che ha laschà sentir il public cun tge tenuta e tschaffen ch'els fan musica e scrivan.



Beni Vigne ed Astrid Alexandre han delectà la radunanza cun musica.